



## Jannie du Toit

Lirieke van my opnames. Meer te kry op my webblad  
[www.janniedutoit.com](http://www.janniedutoit.com)

### VAT DIE PAD

Musiek: Jannie du Toit  
Teks: Jannie du Toit

Vrydagoggend vroeg vat ons die pad  
wonder waar musiek ons nou weer hierdie keer heen gaan vat  
net voor Vereeniging - gras teen geelbruin rantjies  
dit is mooi – ons land is hiér al mooi

Kosmos soom die mielielande langs die pad  
ook al lyk die wêreld hier vir 'n Kapenaar te plat  
Ons eet 'n bietjie biltong, dit maak ons lus vir droeëwors  
En droeëwors maak ons weer lus vir biltong

Ons juig uitbundig oor dammetjies langs die pad  
Laasjaar se droogte het hard aan ons gevat  
Op die lang pad Kaap toe met stories en akkoorde  
Klawers en kitaar - ons harte op die mou  
En dan, teen die aand  
In 'n sitkamer of 'n skuur  
'n Teater of 'n saal  
Dalk om 'n braaivleisvuur  
Deel ons die passie  
Ontbloot 'n mens jou siel  
Betower deur die muses  
Gekoester deur die gloed  
Kom warm harte ons tegemoet

Elke nou en dan vaar ons die wye wêreld in  
Kyk waar daar weer nuwe avonture kan begin  
Ons ry langs die Ryn se kastele deur 'n woud  
Kroeë, katedrale – alles eeue oud

Keisteenstrate oral in 'n middeleeuse stad  
Sigeuners gryp my beursie met my paspoort en laat spat  
Stegies wat spiraal van 'n plein in 'n piepklein dorpie  
Mosseltjies met friet – die lewe is 'n lied  
En dan, teen die aand  
In 'n sitkamer of 'n skuur  
'n Teater of 'n saal  
Dalk om 'n braaivleisvuur  
Deel ons die passie  
Ontbloot 'n mens jou siel  
Betower deur die muses  
Gekoester deur die gloed  
Kom warm harte ons tegemoet

Ons vat alweer die langpad, soos ons al die jare sou  
Volg musiek se spore, wonder waarheen lei dit nou  
Oral waar ons kom deel ons stories en akkoorde  
Met klawers, trom en snaar - ons harte op die mou